

Bettua, su bestiolu de Biddesartu, binchet sa segunda mostra de s'ainu de ratza sarda



Sa segunda editzione de sa mostra regionale de s'ainu de ratza sarda est istada binta dae Bettua de Luigi Agus de Biddesartu (SU) chi est arribadu primu de s'itireddesu Antonio Canu, classificadu paris cun Bonesu e Fortuna a su de duos e a su de tres postos. Organizada dae ANAREAI, AARS, Comunu de Itireddu e Assòtziu ìpica Itireddesa, sàbadu 29 e domìniga 30 de abriale, sa mostra est dedicada fintzas a sas razzas de caddos e de àinos de sa Sardigna e at tentu fintzas nùmeros positivos. Totu cuntentos peri pro more de sa

nàschida durante sa manifestatzione de sa poledda "Itireddesa" de Giuseppe Cotzia de Cùllieri.

Sa manifestatzione est comintzada sàbadu cun sos seminàrios dedicados a sa cura e alimentatzione de s'ainu tentos dae sos dotzentes de su Dipartimentu de Veterinària Eraldo Sanna Passino e Maria Grazia Cappai, subra de sa psicologia de s'ainu de Lisa Mabilia e subra de sa gestione de sos ecuinos chi pascehnt iscapos de Nicolò Lenarda. Su presidente e su direttore de ANAREAI Luca Marcora e Matteo Vasini ant adobiadu imbetzes allevadores e espertos pro chistionare de sa valorizatzione de sas razzas de caddos e de molentes de sa Sardigna.

A sa mostra sunt andados medas familias acumpangiadas dae sos pipios chi, gràtzias a "L'Isola dei Ciuchini" de Suella Antonio Luisi de Uda, ant pòdidu bìvere s'esperientzia de petenare ecaignare sos àinos. Bi fiant peri sos bestiolos de Matteo Pilleri de Santu 'Idu e de Giovannantonio Pilo de Tàtari chi at espostu fintzas sos poleddos biancos de s'Asinara.

Durante sa mostra meda ispàtziu est istadu dadu fintzas a su caddu de su Sarcidanu presente in Itireddu cun sos caddos Ugolino e Osvaldo de Luca Melis de Biddeputzu e a s'ebba Diva de Funtanamela de su Comunu de Làcani, rapresentadu dae su Sindigu Salvatore Argiolas e dae s'Assessore Giuseppe Cosseddu. In particolare, su caddu Osvaldo, chi at partetzipadu dae pagu a Fieracavalli, at allutu s'interessu de sos medas appassionati pro sas particularidades suas. Su Comunu laconesu at in prus at fatu a ischire chi su 24 e su 25 làmpadas at a dedicare a custa ratza duas dies de mostra.

Foto: <https://www.cagliaripad.it/588711/asino-di-razza-sarda-vince-il-ciuchino-bettua-di-villasalto/>